

## Dar in'olma al mintgadi era duront igl onn 2011

Anflar temps per trer flad,  
cu il calender ei tgemblaus cun termins.

Encurir spazi liber,  
cu il mintgadi strapazzescha la convivenza.

Restar ruasseivels,  
cu tut para d'ir sut sura.

Sesentir purtaus,  
cu tema schirenta.

Haver confidanza,  
cu quitaus schmaccan.

Sefidar sin la forza da Diu,  
cu tut para d'esser van.

Surdar la tribulaziun dalla veta  
e midar ella en in regal da carezia.

Arver las portas al Spindrader,  
cu Maria „splunta“ el segn dalla pasch,  
per purtar a nus Jesus Cristus.

Tedlar sin sia supplica:  
**Quei ch'el di a vus, fagei!**

## Daniev e lu?

Cun la vegnida dil Spindrader ha in niev temps entschiet. Otg dis suenter Nadal astgein nus festivar Daniev. En quei connex astgein nus dumandar: Tgei porta il niev onn? Tgei bunas novas astgein nus survegnir? Tgei vegn il Segner a dar a nus ed a mi?

Propiests! Haveis Vus fatg in pèr? Sper ils giavischs e la speranza pil niev onn sauda era in propiest vitier. Quei vul dir: Buca mo da spitgar, mobein era da sez vegnir activs. Tenor il proverbio: "Jeder ist selbst seines Glückes Schmied".

Che nossa veta reusseschi, duvrein nus cletg e la benedicziun dil Segner. Mo nus astgein buca spetgar tochen quei vegn dau a nus d'in di sin l'auter. Nus stuein era sez ir sin via per encurir ed anflar il cletg. Per nossa veta essan nus sez responsabels. Nus astgein era buca seperstgisar da far igl emprem pass pervia d'in concartsgaun che ha trumpau nus. Fortuna e viver endretg dependa era da miu esser, da mia veglia e da mia promptadad.

En Maria havein nus in bien exempel. Siu esser e sia promptadad dat a nus anim, d'esser aviarts era per tut quei che nus schein bugen: "Quei ei per mei nunpusseivel! Gie, per nus buc, denton cun igl agid dil Segner savein nus far dapli sco quei che nus manegiein savens. Maria ha purtau al mund il prenci da pasch. Aschia ei Maria sper esser mumma da Jesus, era la mumma da Diu (Jesus - ver Diu e ver carstgaun).

Tgi sa, tgei "nunpusseivel" ch'il niev onn porta a mi, a Ti? Mo quei saveies: Cun las grazias da Diu astgein nus udir e dar suatientscha al plaid:

**Quei ch'el di a vus, fagei!**

Cun ils megliers giavischs  
Vies sur Peter

## Informaziuns per Laax

### Communiun dils malsauns:

Mesjamna, ils 12-01-2011 suentermiezdi

### Cant dils treis Retgs, sonda ils 8 da schaner 2011

Cordial invit da sentupar els quartiers cun la gruppa dils treis Retgs. Da cuminsonza lein guder il cant ed era il punsch che vegn survius dallas persunas ch'ein stadas promptas da colaborar. A tuts in grond Dieus paghi persuenter. Il decuors dalla sera ei il suandont:

<u>Temps:</u>	<u>Liug:</u>	<u>Collaboraturs/As:</u>
17.30h	Casa Liunga	Romana Brunold Bettina Toggenburg
17.45h	Center Communal	Nesa Coray /Prisca Coray
18.00h	Via Spenda	Fam. Renata Capaul Fam. Mascha Hug
18.15h	Cons	Fam. Iazinta Truog Fam. Marlis Cavigelli
18.30h	Via Grava	Rita ed Augustin Killias
18.45h	Via Davos Baselgia	Marita Bürkli/Sandra Bass
19.30h	Ustrias e hotels	tenor giavisch

Dumengia, ils 9 da schaner 2011 contan ils Retgs era en Baselgia ella s. Messa dallas 10.15 uras.

Nus engraziein cordialmein allas scolastas ed als scolars per lur engaschi. Il recav va en favur da «Cristo Obrero», l'instituziun che promova oravontut la scolaziun da basa dils affons.

### Cordiala gratulaziun

Ils 17 da schaner 2011 astga Judith Cahannes festivar siu 90-avel natalezi. Nus giavischein alla giubilara bia plaschers ella veta da mintga di, buna sanadad, la benedicziun dil Tutpussent ed in legreivel di da fiasta.

## Informaziuns per Falera

### Communiun dils malsauns:

Venderdis, ils 07-01-2011 suentermiezdi

Gievgia, ils 20-01-2011 suentermiezdi

### Ils Retgs visetan il vitg

Igl usit dils Retgs, che serepeta mintg'onn, ei in segn religios. Ina sentupada che duei crear cuminsonza cun spért social per porscher agid a quels carstgauns che basegnan nies sustegn. Als scolars ed al scolast engraziein nus cordialmein per lur engaschi. Il recav va en favur d'ina instituziun caritativa.

### Viseta dils Retgs, mintgamai naven dallas 16.00h

- **Gievgia, ils 6 da schaner 2011, da miez vitg anen**
- **Venderdis, ils 7 da schaner 2011, da miez vitg ano**

Dieus paghi a tut quels che porschan portas aviartas als Retgs.

**Activitads religiusas** en nossa Pleiv fissan buca pusseivlas, sche nus anflassen buca persunas ch'ein promptas da sorprendere in tal survetsch. La Pleiv e la communitad viva tras e cun igl engaschament dils voluntaris. Aschia dattan quellas persunas in bien exempel dil Spért sogn che agescha en mintga battegiu.

In grond Dieus paghi a tuts che han embelliu en differents survetschs nies temps avon e suenter Nadal cun far exerchezis, preparaziuns ed organisaziuns, leger, cantar, sunar,... gie e per tut il veseivel e nunveseivel.

### Sogn Batten

Dumengia, ils 9 da schaner 2011 retscheiva *Anna*, feglia da Carla e Marcus Fritz-Cathomen il sogn sacrament dil Batten.

Nus gratulein cordialmein alla famiglia per la naschientscha da lur affon. Ad Anna giavischein bia sustegn e legria ella cuminsonza dils cartents.